

# Perbuatan sabotaj **ini.**

UM 21 AGO 1965

# ekonomi

**KUALA LUMPUR 20 Ogos —** Datuk Sri Dr. Mahathir Mohamad menyifatkan laporan akhbar berasaskan berita angin kononnya beliau akan bersara pada 28 Ogos ini sebagai perbuatan sabotaj ekonomi kepada negara yang sedang menghadapi kemelesetan.

Perdana Menteri menegaskan berita seperti itu menimbulkan ketegangan serta kegelisahan dalam masyarakat dan mempunyai kesan buruk kepada suasana perniagaan.

"Perbuatan ini adalah perbuatan yang tidak bertanggungjawab. Ia menunjukkan bahawa orang yang berkuasa dalam akhbar ini tidak layak dianugerah kuasa yang begitu kuat," ujarnya dengan nada kesal di majlis penyampaian hadiah kewartawanan anjuran Institut Akhbar di Hotel Hilton malam ini.

Ucapannya itu menyorot kepada berita sebuah akhbar baru-baru ini yang melaporkan tentang kemungkinan seorang yang berpangkat tinggi dalam negara akan bersara.

Menurut Datuk Sri Dr. Mahathir, asas laporan itu ialah berita angin kononnya Perdana Menteri akan bersara pada 28 Ogos.

Sambil mengingatkan akhbar supaya berhati-hati, Perdana Menteri menanyakan: "Sebelum menyertai usaha menjatuhkan kerajaan yang ada, soal yang perlu dijawab ialah apakah kerajaan yang akan menggantikannya akan menjadi lebih baik?"

"Berapa kalikah dalam sejarah dunia yang kita dapati kerajaan revolusioner yang menggantikan adalah lebih

**LIHAT MUKA 6**

# Perbuatan ini sabotaj ekonomi

lebih buruk dan kejam daripada kerajaan yang dijatuhkan?"

"Jika kita belum boleh yakin bahawa kerajaan yang akan menggantikan adalah lebih baik, eloklah kita tidak dengan sengaja memburukkan atau menghalang usaha kerajaan yang sedia ada," ujarnya.

Datuk Sri Dr. Mahathir berkata beliau sedih melihat beberapa akhbar dalam negara ini yang terbawa-bawa dengan aliran Barat tentang kebebasan akhbar atau 'freedom of the press' sehingga tidak lagi peduli akan kesan buruk terhadap negara sendiri.

Beliau berpendapat akhbar dengan pengaruhnya boleh membuat kritik yang membina dan lebih banyak keuntungan akan diperolehi dari usaha ini daripada sengaja bersikap sinis dan membuat kritik kerana suka mengkritik.

Di waktu ini, setelah selesai pilihanraya, kerajaan perlu tumpukan segala tenaga, fikiran dan wang ringgit yang terhad kepada mengatasi beberapa masalah yang terbesar.

"Katanya, jika setiap usaha yang dibuat oleh kerajaan diganggu oleh kritik yang tidak membina, atau sengaja disalah-tafsirkan, maka negara tidak akan mencapai kejayaan. Akhirnya rakyat dan negara juga akan menerima kesan buruknya.

"Ini bukanlah rayuan daripada saya. Ini juga bukan ugutan. Ini adalah pendapat peribadi saya, lahir daripada kesedihan melihat beberapa akhbar dalam negara ini yang terbawa-bawa dengan aliran Barat tentang 'freedom of the press' sehingga tidak lagi peduli akan kesan buruk terhadap negara sendiri," jelasnya.

Memandangkan akhbar begitu berpengaruh, Perdana Menteri menekankan penting akhbar dikuasai oleh orang yang bertanggungjawab terhadap negara.

Katanya, akhbar tidak seharusnya begitu mengutamakan kepentingan perniagaannya sehingga memburukkan keadaan negara.

"Di sinilah duduknya kebijaksanaan seseorang yang berkuasa ke atas akhbar. Mungkin pendedahan perlu dibuat tentang penyalahgunaan kerajaan demi kepentingan negara."

"Tetapi kebenaran perkara yang hendak didekahkan perlu ditentukan terlebih dahulu terutama jika pendedahan itu boleh memburukkan keadaan dalam negeri."

Beliau juga menarik perhatian, yang penting bukanlah akhbar bebas atau tidak, tetapi apakah alat yang begini berkesan digunakan untuk kebaikan.

Datuk Sri Dr. Mahathir juga menyentuh mengenai satu daripada tema yang sering diperkatakan akhir-akhir ini oleh sebahagian daripada masyarakat iaitu 'deregulation'.

Menurutnya, kerajaan digesa supaya tidak mengemukakan bermacam-macam peraturan yang mengganggu kebebasan rakyat.

Beliau menegaskan, sebenarnya kerajaan tidak ingin 'regulate' masyarakat kerana lebih banyak 'regulation', lebih berat beban kerajaan.

"Malangnya ramai daripada mereka yang sepatutnya lurus dan bertanggungjawab didapati tidak lurus dan tidak bertanggungjawab."

"Sebab itu duit bank-bank dan koperasi-koperasi, syer syarikat, permit perniagaan dan lain-lain lagi diselewangkan dengan begitu mudah dan kerap."

Sambil menyatakan kerana mereka ini, orang lain turut menjadi mangsa, Datuk Sri Dr. Mahathir berkata kalau kerajaan amalkan deregulation secara meluas di negara ini, huru-hara akan berlaku.

"Sebab itu, kalau ada sedikit sebanyak aturan-peraturan termasuklah da-

lam bidang surat khabar, adalah lebih baik jika kita terima dan sesuaikan diri dengannya."

Beliau menanyakan: "Sebagai alat yang begitu berpengaruh, apakah akhbar akan memilih untuk membina negara ini atau hanya memikirkan tentang cara yang termudah untuk meningkatkan pengedaran."

Perdana Menteri dukacita kerana mereka yang tidak senang hati dengan negara ini, lebih suka menarik perhatian kepada berita-berita yang menentang kerajaan, seolah-olah akhbar tidak akan menjadi akhbar jika ia sentiasa menyokong kerajaan.

Mereka ini juga menyalakwa bahawa kerajaan menyokong akhbar di negara ini manakala penulis dari Malaysia yang hendak 'bermuka-muka' dengan orang inipun turut serta mengecam kerajaan negara sendiri.

"Amatlah memalukan kerana masih ada orang Malaysia yang mempunyai perasaan rendah diri atau 'inferiority complex' dan percaya orang putih semua betul dan bangsa sendiri perlu mendapat pengiktirafan daripada mereka."

Beliau mengulangi akhbar tidak pernah bebas, walaupun di Amerika Syarikat dan kebanyakan media antarabangsa yang terkenal, umpamanya, dikuasai oleh orang-orang Yahudi.